

Յովհաննու Կարապետի, ծախուք Մոլլասուլէմանցի Յովհաննէսեան տեառն Յակոբայ քահանայի և աշխատութեամբ բարեպաշտ ժողովրդեան 1886»:

Այս տեղ կը ներկայացնեմ Ռէս Աւոյի օդան, ժողովրդեան հաւատքը Խաստուրայ վանքի վերան և գիւղական բարբառով մի հին անցք.

Ալաշկերտի բարեխառն ամրան յաջորդած էր ցըրտաշունչ ձմեռ, գիւղացիք վերջացուցած իւրեանց դաշտային գործեր և ձմեռուան պատրաստութիւն, փակուած էին իւրեանց տներու մէջ, իւրեանց զբաղումը միայն մնացած էր անասնոց խնամ տանել և ժողովրդական օդաներու մէջ հաւաքուիլ ժողլել (զբաղուիլ), հեքեաթ ասել:

Օդաներն ընդհանրապէս շինուած են ախոռներու մէջ. ուէս Աւոն որ Խաստուր գիւղի երեւելիներէն էր, ունէր մի օդա, ուր կը հաւաքուէին գիւղի հասարակութիւնը, կը նստէին խոտից հիւսուած կոշտ խսիրներու վերայ. սենեկի ներքին կողմն դրուած էր ջրի քուլաքն ու շարպիքն (ջրի բաժակ թիթեղէ շինուած) և որոց վերան բարձր, սեան կողին հաստատուած էր ձիթէ ճրագն, որ վառելու միջոցին թանձր ծուխ մի կարձակէր, փակ սենեակը կը լեցնէր. սենեկի վերին կողմն որմի մէջ շինած էր բուխերիկն, ուր կուտուած ցանի կտորներ կը վառէր: Սենեկի երկու կողմն փռուած էր, մէջ տեղն բաց էր բուխերիկը գնալ գալու համար. մէկ կողմի բարձր տեղը նստած էր գիւղի քահանայն եթէ թուրք կամ քուրդ նոյն տեղը բռնած չլինէին: Մի ծերունի Յովհաննէս որ իւր զրոյցներով և